

儒門事親

金 睢州 張子 和 著
明 新安 吳勉學 校

卷四

風一

夫風者。厥陰風木之主也。諸風掉眩。風痰風厥。涎潮不利。半身不遂。失音不語。留飲飧泄。痰實嘔逆。旋暈。口喎。搐搦。僵仆。目眩。小兒驚悸。狂妄。胃脘當心而痛。上支兩脇。咽膈不通。偏正頭痛。首風。沐風。手足攣急。肝木爲病。人氣在頭。

防風通聖散 防風天麻湯 防風湯 祛風丸 排風湯 小續命湯 消風散

暑二

夫暑者。爲少陰君火之主也。諸痛癢瘡瘍。癰疽腫毒。及胃煩熱。嗟乾欬喘。唾血泄血。胛腫。肩脾皆內痛。心痛。肺脹。腹脹。鬱悶。風溫病多發。風傷于榮。溫傷於衛。血爲榮。氣爲衛。其脈兩手多沉。自汗出。身重。多睡必軀。三日以裏。且宜辛涼解之。或辛溫解之。如不已。表症未罷。大不可下。如下則胃中虛空。四日之外。表熱入裏。則譫語口乾。發疹潮熱。直視失渡者。十死八九。肺金爲病。人氣在胸。及小兒瘡疹丹標。但發人氣在腹。

白虎湯 桂苓甘露散 化痰玉壺丸 益元散 玉露散 石膏散

濕二

夫濕者。爲太陰濕土之主也。諸濕腫滿。霍亂泄注。胛腫骨痛。及腰膝頭項痛。風痺痿厥。唾有血。心懸如飢。熱痛始作。三陽受之。一日太陽。二日陽明。三日少陽。可汗而已。如四日太陰。五日少陰。六日厥陰。可下而已。或七日不愈。再傳至十三日。大邪皆去。六經悉和則愈矣。腎水爲病。

五苓散 葶藶木香散 白朮木香湯 益元散 大橘皮湯 神助散 桂

苓白朮丸

火四

夫火者。少陽相火之主也。諸暴死。發熱惡寒。痛病大作。傳爲水腫。面黃身癢。泄注膿血。赤白爲利。癰腫疽毒。丹熛瘍疹。小兒疳瀉。腹脹。暴下如水。心胸中熱。甚則顛衄。胸脇皆痛。耳聾口苦舌乾。與臟毒下血。米穀不化。腸鳴切痛。消渴上喘。肺金爲病。

涼膈散 黃連解毒湯 瀉心散 神芎丸 八正散 調胃散 調胃承氣湯

燥五

夫燥者。是陽明燥金之主也。諸氣憤鬱。腸胃乾涸。皮膚皴揭。脇痛。寒瘧。喘咳。腹中鳴。注泄。驚澹。脇肋暴痛。不可反側。噎乾面塵。肉脫色惡。及丈夫癰疽。婦人少腹痛。帶下赤白。瘡瘍瘰癧。喘咳潮熱。大便秘燥。及馬刀挾癭之瘡。肝木爲病。

神功丸 脾約丸 麻仁丸 潤體丸 四生丸

寒六

夫寒者是太陽寒水之主也。諸惡冷濕痺。肘臂攣急。秋濕既多。寒咳爲嗽。痰厥心痛。心中澹澹大動。胸脇胃脘痛。不可食。食已不饑。吐利腥穢。屈伸不便。上下所出不禁。目盲。堅痞。色炆。渴而飲冷。積水。足浮腫。囊縮。四肢冷。爪甲青。心火爲病。

薑附湯 四逆湯 二薑湯 朮附湯 大已寒丸 理中湯

解利傷寒七

人冒風時氣。溫病。傷寒。三日以裏。頭痛身熱惡寒。可用通聖散。益元散。各五七錢。水一大碗。入生薑十餘片。葱白連鬚者十餘莖。豆豉一撮。同煎三五沸。去滓。稍熱。先以多半投之。良久。用釵子於咽喉中探引吐了。不宜嗽口。次用少半。亦稍熱投之。更用葱醋酸辣湯投之。衣被蓋覆。汗出則愈矣。如遇世亂。內經曰。歲火太過。炎暑流行。火氣太盛。肺金受邪。上應熒惑。大而明現。若用辛涼之劑解之。則萬舉萬

全也。若遇治世人安。可用升麻湯。葛根湯。敗毒散。辛溫之劑解之。亦加蔥根白豆豉。上涌而表汗。內經曰。因其輕而揚之。揚者發揚也。吐汗發揚寒熱之邪。既吐汗之後。必大將息。旬日之後。其邪不復作也。

又一法。或於無藥之處。可用酸齏汁一大碗。煎三五沸。去菜葉。猛服訖。少間。用釵子咽喉中探引吐了。如此三次。後煎蔥酸辣湯投之。以衣被蓋覆。汗出則解。內經曰。酸苦涌泄爲陰。涌者吐也。傷寒三日。頭痛身熱。是病在上也。在上者固宜涌之。然後以淡漿粥養之。一二日則愈矣。

又一法。可用不臥散解之。於兩鼻內噴之。連噴三二十次。以衣被蓋覆。用此藥時。當於暖室中嚏罷。以酸辣漿粥投之。汗出如洗。嚏噴者。同吐法也。此法可與雙解散爲表裏也。

又有導引一法。可於一間處用之。先教病人盤脚而坐。次用兩手交十指。攀腦後風池風府二穴。乃是風門也。向前叩首。幾至於地。如此連點一百二十數。急以蔥醋粥辛辣湯投之。汗出立解。

傷寒溫疫時氣冒風中暑俱四時不正之氣也。人若初感之。皆頭痛惡寒身熱。及

寒熱往來。腰脊強。是太陽經受之也。內經曰。可先治內而後治外。先用生薑葱白豆豉煎雙解散。上涌及汗出則解。如不解者。至五六日。或不大便。喘滿譫語實熱。兩手脈沉。可用調胃大小承氣湯下之。慎不可用銀粉巴豆霜杏仁羌花熱藥。下之則必死。此先治外而後治內也。如大汗之後。慎不可食葵羹蘗菜羊猪雞犬魚兔等肉。惟不先明。必致重困。後必難治也。傷寒七八日。發黃有斑。潮熱腹滿者。或痰實作止。雖諸承氣湯下過者。仲景曰。寸口脈浮滑者。可用瓜蒂散吐之。然傷寒寸口脈浮滑者可用。雜病寸口脈沉者可吐。叔和云。寸脈沉。今胸有痰。啓玄子曰。上盛不已。吐而奪之是也。

風入

夫中風。失音悶亂。喎斜口眼。內經曰。風之爲病。善行而數變。故百病皆生於風也。可用三聖散吐之。如不省人事。牙關緊閉。粥菜不能下者。煎三聖散。鼻內灌之。吐出涎。口自開也。次服通聖散。涼膈散。大人參半夏丸。桂苓甘露飲等。大忌雞猪魚兔酒醋蕎麵。動風引痰之物。吐痰之法。在方論中。

頭風眩運。手足時復麻痺。胃脘發痛。心腹滿悶。按之如水聲。可用獨聖散吐之。吐訖。可服辛涼清上之藥。仲景曰。此寒痰結於胸中之致然也。

痺九

夫大人小兒。風寒濕三氣。合而爲痺。及手足麻木不仁者。可用鬱金散吐之。吐訖。以導水丸。通經散泄之。泄訖。以辛溫之劑。發散汗出。則可服當歸芍藥乳沒行經和血等藥。如不愈。則便不宜服此等藥。

痿十

夫男女年少。面黃身熱肌瘦。寒熱往來如瘧。更加涎嗽不止。或喘滿面浮。此名曰肺痿。可用獨聖散吐之。吐訖。次用人參柴胡飲子。小柴胡飲子。加當歸桂苓甘露散之類。內經曰。男女之病皆同也。男子精不足。是味不化也。女子血不流。是氣不用也。又曰。形不足者。溫之以氣。精不足者。補之以味是也。

厥十一

夫厥之爲病。手足及膝下或寒或熱也。舉世傳爲脚氣寒濕之病。豈知內經中本無脚氣。陽氣衰于下。則爲寒厥。陰氣衰于上。則爲熱厥。熱厥爲手足熱。寒厥爲手足寒也。陽經起于足指之表。陰經起于足心之下。陽氣勝則足下熱。陰氣勝則足下寒。熱厥者寒在上也。寒厥者熱在上也。寒在上者以溫劑補肺金。熱在上者以涼劑清心火則愈矣。若尸厥、痿厥、風厥、氣厥、酒厥。可以涌而醒。次服降火益水。和血通氣之藥。使粥食調養。無不瘥者。若其餘諸厥。倣此行之。慎勿當疑似之間。便作風氣相去邈矣。

痢十一

夫痢病不至於目瞪如愚者。用三聖散投之。更用火盆一個。於暖室中。令汗下吐。三法俱行。次服通聖散。百餘日則餘矣。至於目瞪愚者。不可治。內經曰。神不得守。謂神亂也。

瘧十二

夫富貴膏粱之人病瘧。或間日。或頻日。或作熱。或作寒。或多寒少熱。或多熱少寒。宜以大柴胡湯下之。下過三五行。次服白虎湯。玉露散。桂苓甘露散之類。如不愈者。是積熱大甚。宜以神芎藏用丸。三花神祐丸。調胃承氣湯等藥。大作劑料下之。下訖。以長流水煎五苓散服之。或服小柴胡湯數服亦可。如不愈。復以常山散吐之。後服涼膈散。白虎湯之類。必愈矣。大忌熱麵及羊肉雞猪魚兔等物。如食之。瘧疾復作。以至不救。

貧賤藟藿之人病瘧。以飲食疎糲。衣服寒薄。勞力動作。不可與膏粱之人同法而治。臨發日。可用野夫多効方。溫脾散治之。如不愈。用辰砂丹治之。則愈矣。如服藥訖。宜以長流水煎白虎湯五苓散服之。不宜食熱物及燥熱之藥。以瘧疾是傷暑伏熱之故也。內經曰。夏傷於暑。秋必痎瘧。可不信哉。忌物同前。

泄痢十四

夫大人小兒暴注。瀉水不已。內經曰。注下也。注下者。水利也。火運太過之病。火主暴逆之故也。急宜用水調桂苓甘露散。五苓散。益元散。或以長流水煎過放冷服。

則愈。慎不可驟用罌粟殼。乾薑荳蔻聖散子之類。縱瀉止則腸胃不通。轉生他疾。止可以分陰陽利水道而已。

痢利十五

夫病痢利。米穀不化。日夜無度。腹中雷鳴。下利完穀出。可用導水丸。禹功散。瀉訖。一二日可服胃風湯。不愈則又可與桂枝麻黃湯。發汗則愈矣。內經曰。久風入中爲腸澼飧泄。啓玄子云。風在腸中。上熏於胃。所食不化而出。又云。飧泄者是暮食不化也。又經云。春傷於風。夏必飧泄。故可汗而愈。內經曰。風隨汗出。痛隨利減。若服豆蔻罌粟殼之類。久而不輟。則變爲水腫。以成不救也。

臟毒下血十六

夫臟毒下血。可用調胃承氣湯加當歸。瀉訖。次用芍藥蘗皮丸。黃連解毒湯。五苓益元各散。調下五七錢服之。內經曰。腸澼便血。何如。答曰。澼者。腸間積水也。身熱則死。寒則生。熱爲血氣敗故死。寒爲榮氣在則生。七日而死者。死於火之成數也。

下利膿血十七

夫下利膿血。腹痛不止。可用調胃承氣湯。加生薑棗煎。更下藏用七八十九。量虛實加減瀉訖。次用長流水。調五苓散五七錢。或加燈心煎。調下亦得。調益元散五七錢亦可。大忌油膩一切熱物則愈矣。

水泄不止十八

夫男子婦人。病水濕瀉注不止。因服豆蔻烏梅薑附峻熱之劑。遂令三焦閉滯。水道不行。水滿皮膚。身體否腫。面黃腹大。小便赤澀。兩足按之陷而復起。內經曰。諸濕腫滿。皆屬脾土。可用獨聖散吐之。如時月寒涼。宜於暖室不透風處。用火一盆。以藉火力出汗。次以導水禹功散。量虛實瀉十餘行。濕去腫減則愈矣。是汗下吐三法齊行。既汗下吐訖。腑臟空虛。宜以淡漿粥養腸胃二三日。次服五苓散。益元同煎。燈心湯調下。如勢未盡。更宜服神功散。舊名葶藶散。可以流濕潤燥。分陰陽利小便。不利小便。非其法也。既平之後。宜大將息。忌魚鹽酒肉菓木房室等事。如

此三年則可矣。如或不然。決死而不救也。

痔漏腫痛十九

夫痔漏腫痛。內經曰。因而大飽。筋脈橫解。腸僻爲痔。痔而不愈。變而爲漏。同治濕法而治之。可先用導水丸。禹功散。瀉訖。次服枳殼丸。木香檳榔丸。更加以葵羹。菠菜猪羊血等。通利腸胃。大忌房室。雞魚酒醋等物勿食之。

霍亂吐瀉二十

夫霍亂吐瀉不止者。可用五苓散。益元散各停。冰水調下五七錢。如無冰水。可用新汲水調下桂苓甘露散。玉露散。清涼飲子。調下五七錢。或香薷湯調下五七錢。亦可。如無以上諸藥。可服地漿三五盞亦可。地漿者。可於淨地掘一井子。用新汲水一桶。並於井子攪令渾。候澄清。連飲三五盞立愈。大忌白朮湯。薑桂烏附。種種燥熱之藥。若服之則必死矣。巢氏云。霍者揮霍而成疾。亂者陰陽亂也。皆由陰陽清濁二氣相干故也。

大便澀滯二十一

夫老人久病。大便澀滯不通者。可服神功丸。麻仁丸。四生丸。則愈矣。時復服葵菜菠薐猪羊血。自然通利也。內經云。以滑養竅是也。此病不愈。令人失明也。

五種淋瀝二十二

夫大人小兒病沙石淋。及五種淋瀝閉癢。并臍腹痛。益元散主之。以長流水調下。入正散。石葦散。依方服用。此三藥皆可加減服之。

酒食不消散二十三

夫一切冷食不消。宿酒不散。亦同傷寒。身熱惡寒。戰慄。頭項痛。腰脊強。及兩手脈沉。不可用雙解。止可用導飲丸。五六十丸。量虛實加減。利五七行。所傷冷食宿酒。若推盡。則頭痛等病自愈也。次以五苓散。生薑棗長流水煎服。五六服。不可服酒癥進食丸。此藥皆犯巴豆。有熱毒之故也。

儒門事親 卷四 痼疾傷 沉積水氣 諸積不化 骨蒸熱勞 一四

酒食所傷 二十四

夫膏粱之人。起居閒逸。奉養過度。酒食所傷。以致中脘留飲。脹悶。痞膈。醋心。可服木香導飲丸以治之。夫芻蕘之人。飲食粗糲。衣服寒薄。勞役動作。一切酒食所傷。以致心腹滿悶。時嘔酸水。可用進食丸治之。

沉積水氣 二十五

夫一切沉積水氣。兩脇刺痛。中滿不能食。頭目眩者。可用茶調散。輕涌訖。冷涎一二升。次服七宣丸則愈矣。木香檳榔丸。導飲丸亦妙。不可用巴豆銀粉等藥。

諸積不化 二十六

夫諸積不化。可服無憂散。每月瀉三五次。可用桂苓白朮丸散。妙功丸。大忌生硬粘滑動風發熱等物。

骨蒸熱勞 二十七

夫男子婦人。骨蒸熱勞。皮膚枯乾。痰唾稠粘。四肢疼痛。面赤唇乾煩躁。睡臥不寧。或時喘嗽。飲食少味。困弱無力。虛汗黃瘦等疾。內經曰。男子因精不足而成。女子因血不流而得也。可先以茶調散輕涌訖。次以導水禹功散。輕瀉三兩行。後服柴胡飲子。桂苓甘露散。搜風丸。白朮調中湯。木香檳榔丸。人參犀角散之類。量虛實選用而用之。如咯血吐血便血。此乃亡血也。並不宜吐。吐之則神昏。內經曰。血者人之神也。故亡血則不宜吐。慎不可服峻熱薑附之藥。若服之則飲食難進。肌肉消削。轉成危篤也。五勞之病。乃今人不明。發表攻裏之過也。大忌暑月於手腕足外踝上着灸。手腕者。陽池穴也。此穴皆肌肉淺薄之處。灸瘡最難痊可。及胸次中脘臍下背俞三里等穴。或有灸數十者。及以燔針。終無一效。病人反受苦。可不思之。勞疾多饒。所思之物。但可食者。宜食療本草而與之。菠菜葵羹。冰水涼物。慎不可禁。以圖水穀入胃。脈道乃行也。若過忌慎。則胃口閉。胃口閉則形必瘦。形瘦脈空。乃死之候也。諸勞皆可倣此。

虛損二十八

夫病人多日。虛損無力。補之以無比山藥丸則愈矣。

上喘中滿二十九

夫上喘中滿。醋心腹脹。時時作聲。否氣上下。不能宣暢。叔和云。氣壅三焦不得昌。是也可用獨聖散吐之。吐訖。次用導水禹功。輕瀉三五行。不愈。更以利膈丸瀉之。使上下宣通。不能壅滯。後服平胃散。五苓散。益元散。桂苓甘露散。三和散。分陰陽利水道之藥則愈。

一切涎嗽三十

夫富貴之人。一切涎嗽。是飲食厚味。熱痰之致然也。先用獨聖散吐之。吐訖。可服人參散。通聖散。加半夏。以此止嗽。更服大人參半夏丸。以之化痰也。大忌酸鹹油膩生硬熱物也。

咳嗽三十一

夫貧難之人咳嗽。內外感風冷寒濕之致然也。內經曰。秋傷於濕。冬生咳嗽。可服寧神散。寧肺散。加白朮之類。則愈矣。忌法同前。

咳逆三十一

夫男子婦人欬逆。俗呼曰吃忒。乃陰陽不和也。乃傷寒亦有欬逆者。並可用既濟散治之。忌寒熱物。宜食溫淡物。以養胃氣耳。

風痰三十二

夫風痰酒痰。或熱在膈上。頭目不清。涕唾稠粘。或欬嗽上喘。時發潮熱。可用獨聖散吐之。吐訖。可服搜風丸。涼膈散之類。內經曰。流濕潤燥是也。

咯血衄血嗽血三十四

夫男子婦人。咯血。衄血。嗽血。欬膿血。可服三黃丸。黃連解毒湯。涼膈散。加桔梗當歸。大煎劑料。時時呷之內。經曰。治心肺之病最近。藥劑不厭頻而少。時時呷之者。